

四庫全書

集部

欽定四庫全書

范忠貞集卷四

清苑劉可書編

吾廬存稿

永平秋夜釣臺汎月

極望知流盡輕舟岸岸移恰迴叢樹後已在小橋西星
動漁燈亂天寒雁陣低隱淪何處覓此地有夷齊

聞砧曲

香杵紋砧素練稠深閨少婦迴生愁敲落天邊一片秋
雲亦隨之墜不流金微鐵嶺路嫖忽安得乘風跨玉蚪
平谷十六夜泛月送郭子還都

清光猶勝昨皎皎浸前溪對此仍圓夜翻憐欲缺時惺
聲秋外咽離緒酒前迷獨有漁陽雁終隨北斗飛

銜回電霧

天隘鬱初極停雲忽報秋乍來雙闕動紛迸百林愁星
月驚相見炎涼寂自收化工何意緒倉卒動神謀

孟秋望夜偶作

嘯罷復長嘯明河雲外明雁飛霜影薄螢墜葉梢輕歲
歲隨星變愁愁逐病生何如烏夢穩砧杵自秋清

冬獵篇

朔氣森冽天地愁層巒徹夜電光流捲書拭劍水盈溝
呵手敲冰飲紫骝曉霜光裏寒凝目四野垂天星斷續
初日沈沈上大荒高旗厯厯翻山曲黃雲慘壓鼓隆隆
健兒舒臂鳴弭弓弦逆風高天色酸馬蹄蹀地響聲乾

癡鷹忽怒犬跳躑飛走羽毛無一完獸急人忙各顛倒
血肉淋漓洿枯草倉皇虎豹出林彎按轡拈弓閒更好
烝徒增增後且前鋒鏑參差明復鮮古人蒐苗獮狩皆
寓武一生一殺寧徒然孔子釣弋亦獵較湯雖一面之
網仁心豈能全

東臯泛月

村童曳小艇橫直復傾欹沼面風初定厓陰月故遲柳
煙酣鳥夢水色浸人衣歸臥東窗曉乾坤一息機

偶占

柳眼纔舒笑欲顰
風吹頭上拂愁人
愁人正似風前柳
辜負清光三月春

雨止聞師時中自浙歸

相聞渾未了
不語轉愁生
雨葉暗前暗
風燈壁上明
有情惟密友
無夢只疎更
為倩雲中月遙傳
共望情

孟夏登樓作此

花事今餘幾
登樓興轉賒
鶯聲林樾老
蝶翅竹簾斜
池

水光搖練鑪烟碧透紗凭欄西望盡遠樹隱山家

白丁香

落花春靜寂無知誰剪霜團密綴枝杆影可宜仙子樹
鈴心不傍隱君離鬚乾蝶粉難為蠶舌倩鶯聲寄所思
為語封姨休妬盡尊前贏得一尋詩

次洪畏軒世兄燕臺贈答韻

德星自昔兄兼弟往路曾悲參與商別去八年勞夢寐
書來千里見容光少文交誼生而定子美詩篇老益蒼

芻圃江湖聞曠達梅花鐵石作心腸金臺雅集懷金谷
雪苑棲遲憶雪堂山淨鷺鷺飛點點天高鴻雁列行行
獨憐白也詩千首所謂伊人水一方學以斷齋同冷粥
情如啖蔗得寒漿江雲相望多春樹落月猶疑滿屋梁
太始五言曾發覆永和三月記流觴我慚永叔題師魯
君比任安友子長未免有情誰遣此遂令千古嘆茫茫

祝朱母張太夫人

徐充郊平生濃綠雲氣依微迎皎旭中有華堂開紫芝

氤氳吹送仙子曲曲曰雲璈悠且揚女婺徹大荒井臼
昔操梁家婦母德今誇陶家娘莫言百尺邁風節莫言
雙鬢堆霜雪前庭手植三珠樹亭亭饒作棟梁具九天
花誥舊銀臺銓曹如水聲如注北極恩崇特詔來百千
車馬列城隈霞觴酒映青蒲色斑綵堦前舞似萊舞一
回酒一杯願得長年長見萬華開

行田紀懷

單車瘴嶺驅中夏千里炎荒度夕陽自是先憂期後樂

却緣聖主視如傷愴帷戴雨行泥隴使節馳星破曉
光每值道塗全梗塞忍看比屋半流亡芻茭幸不煩民
力糗糒何妨亦自將我黍漫言嘗肯否吾民久未厭粧
糠雁鴻欲集聲先咽鳩鵠相逢色已慘草澤三空寧類
漢桑林七事却同商瘞仍無肉何由補繭已窮絲不及
忙滿地榛蕪成草昧稽天崩潰竟洪荒老翁行役悲溝
瘠寡婦誅求哭路旁聞道使君生化虎更傳令史共為
狼埋輪已誓從都候叱馭誰能畏太行飢溺只今寧幹

止澄清於此憫懷望敢云善政能匡植豈為虛名起激揚但使鞠躬臣貌瘦寸心聊以報吾皇

浙東道中作

最愛名山未得遊已見名山未許住牛車拖過錢塘潮
馬首帶來銀岱露禹陵一拜便登舟天姥纔瞻却回步
天台雁蕩雨初深華頂石梁寒欲暮腳底低窺望海尖
耳根平洗飛雲度尋徑攀藤虎豹驚衝潭擊櫂蛟龍怒
灘急山腰響白雲林深谷口迷紅霧汙雨不離三伏天

蠟屐已穿八千路何時重到玉峰頭笑共仙人搏白兔
生平所見惟玉甌峰為奇絕至今猶神往也

因畧南湖遂至洞霄宮偶爾題壁

諸峰平市碧嶙峋玉井蓮花擁至尊未到已疑仙佛地
重來翻愧宰官身偶尋大滌穿黃竹為訪棲真披翠雲
忠定紫陽提舉處江南閒殺老謀臣

辛亥春行田駐節張羅浮諫議涉園賦以貽之

精衛銜石東南決女媧煉石西北缺神聖千古無完功

高人心與造化同海鹽南郭鮮原上萬畝桑麻平似掌
其間十畝有羣松怪石轟騰變罔兩借問此中居者誰
張公昔歲長安歸補天隻手用不盡聊於丘壑開崔嵬
平地千峯水百曲隨意植梅兼蒔竹松雲梅雪竹烟間
又綴紅桃環柳綠亭榭離奇皆自然小橋仄徑徧宜偏
諸峰四面各相看曲室幽窗時見焉中有一峰特高聳
東望海濤如雪涌天水平吞日夜愁星辰市踏參差動
我自生平最好奇一聞名勝竟居之未問主人先看竹

不嫌洿壁狂題詩二月春風花正好行車東出嘉禾道
百萬蒼生為去年桑田變海無青草天氣雖春民物秋
長民物者能無憂何當大補東南缺須知精衛難為謀
主人又復出山去定寫流民進朝寧猿鶴今遺三徑空
却使忙人等閒住張公張公天下豪不隱山林隱市朝
補袞望君畱北闕掛冠吾欲返東臯

春郊口號

數椽茅屋綠烟低幾樹桃花絳雪飛為買村醪無覓處

蠻姬笑指小橋西

桂山堂為平湖陸鶴田侍御作

當湖十里清溪曲百道寒流界棋局中有山堂叢桂中
環籬一色皆修竹有竹何可無主人主人名字清且芬
玉階仙仗為香吏金粟如來是後身昔年袖裏明光草
屈注天潢肅馳道天子留心與趙堯諸侯落膽愁溫
造歸來日在山中堂淮南叢桂全無香秋風萬里九霄
碧坐看繁花如霧黃吾之東行正春莫營田日走湖橋

路主人為我破蒼苔相攜直到林深處時當牡丹花盛
開臨池尚有九英梅小橋箕踞坐相得鬚眉照水無塵
埃更有樓前數株梓木中之玉樹之子精神能獨護羣
花惡風暴雨難驅使我聞太丘功德多譬如桂樹泰山
阿君家世代有雙璧元方季方今如何在昔名園洛陽
郡一盛一衰闊世運宣力之餘樂未央況逢聖世如
堯舜匆匆歸去心交加回首林泉隔紫霞為約清秋白
露後乘風來看黃金花

西谿探梅

醉眼朦朧望夕暉
素枝斜映玉烟飛
高歌一曲拈花帶
載得春光午夜歸

泉公亭僧舍題壁

三月春光澹碧山
恰來花發又花殘
忙中歲月驅馳盡
海上風雲指顧間
杜老漫吟歸馬逸
莊生徒羨白鷗還
茅菴一宿仍卑濕
未許浮生半日閒

送魏興士歸贛州

木樨香遍武林谷未得乘風一問焉俗吏那堪詩酒興
病軀偏與藥罐緣勾庭已跨揚州鶴興士重開章貢船
悵悵望南還望北蓼花蘆雁滿寒川

六月朔日訪客僧舍未遇閒步堤上偶誦幼弟彥
公馬上口占六橋桃柳是新栽之句殊增南北
之感漫成十絕句

六橋桃柳是新栽鎮日遊人千萬回隱隱簫聲船裏度
輕輕雲影日邊來

白蓮

橋頭兀坐望層波一片琉璃擁玉蛾更有清風添綽約
輕翻綠葉蓋殘荷

泛月

團團十月盡青山遍插荷花遙水灣莫怪遊人清興遠
扁舟更載月明還

伯兄初度

驀憶昔年今日裏預添鶴算別華筵霏霏雨歇歌聲靜

衝破輕煙採碧蓮

孤山七賢祠

偶對羣賢意轉迷
風流事業豈湖堤
欲招處士孤山鶴
跨向遼東華表栖

家慈北上

徘徊堤上自躊躇
聞道舟停駱馬湖
深恨一官居此地
枝頭羞見下飛鳥

瀛臺入直

曾看龍舸泛湖西
映日紅花色更齊
每憶長安直北望
青山重疊白雲低

插秧

螺黛平看萬斛園
農人遙唱稻秧肥
聲從谷出連山應
掠起長空白鷺飛

眠叟

綠柳濃陰白板扉
竹床浸水倚漁磯
野翁睡足渾無事
靜看天邊暮鳥歸

靜看天邊暮鳥歸

歸棹

堤遠荷花花遶湖湖心明月漾驪珠輕舟搖入烟深處
驚起花間兩睡鳧

范公所作西湖十詠或寓懷孝友或托興農桑篇什雖微有與民同樂之至意公撫浙以來實心愛民萬口傳頌履公庭則刑清政簡聽公論惟禮教為先得詩人溫厚和平之道故其詩足以傳余請假歸見西湖復栽桃柳亭榭聿新喜在位諸公嗣徽蘇白而更

喜讀范公之詩因山人何含白請敬題數言以誌湖
山盛事

虎林黃機壬子秋日題

范忠貞集卷四

欽定四庫全書

范忠貞集卷五

清苑劉可書編

百苦吟

自序

大地有苦海焉能溺人亦能成人吾輩曾具至性
履險不渝一身之苦樂夫何足計惟是古今正人
哲士雖當顛沛憂患咏歌見志往往牢騷感憤必
於詩焉發之吳門嵇子留山天下士也與予以道

誼稱莫逆交生平氣節初未嘗以境之苦樂易其
心蓋予之信嵇子亦猶嵇子之信予也癸丑秋從
予入閩未數月而予遭異變嵇子與三山林子能
任會稽王子幼譽華亭沈子天成同罹其難閱今
兩載餘矣嵇子於困鬱中游戲筆墨作百苦七言
絕句而三子依韻答和予讀之不禁泣然心悲竊
自嘆不辰既上弗克酬

君父之恩下莫能慰蒼生之望而又累我知交如此每

一念至何以為情故自被難時水漿不入口者旬
餘日求一死以明方寸今奄奄一息復何心於筆
墨但以諸子無辜受累率爾勉和附錄篇末畧誌
一時同難之情使後人知吾輩之咏歌各有所屬
非第為一身之苦樂而已也予之未出苦海者惟
以有負於

君有負於親而且有負於知交為有生莫大之恨事默
默此心萬劫不磨又豈筆墨之所能罄也哉康熙

丙辰初夏三韓髡翁謹識

颶風

龍怒神嗔風雨旋
蛟宮社樹舞城顛
孤臣何幸邀天顧
獨剩床頭百瓦椽

瘴雨

烏雲漠漠四山橫
簷溜潺潺墻水平
牀底湯湯鳴活活
虛舟蕩蕩泛蓬瀛

積潦

濃陰含雨恨難收扶杖堦除數破漚滴滴心頭猶未死

驂龍擎霧舞吳鈎

炎蒸

地蒸天炙煉朱顏一寸光明鉅鐵頑任炙不焦蒸不爛

渾淪天矯碧空間

凍雪

徹夜冰魂屢暗驚乾坤何事靜無聲霏霏碎玉光難滅

馥馥寒梅味更清

連陰

鼻鼽胸脹氣如蒸泥汗淋漓餓眼瞢宿霧荒烟吹不斷
淒淒無語枕癯肱

霉濕

乍晴乍雨幻無邊燥濕薰陶色相鮮死圓高低鋪紫氍
床楹日夜長青錢

泥濘

霏霏雨雪幾曾休木套縱橫踏淺流滿眼汚泥呼果日

速舒烈焰灼盲鰐

昏黑

落日昏沈歸暮鴉紛紛羣動月光斜人我相泯須臾靜
時奈鄰溝叫夜蛙

昧旦

雞鳴驚起索朝冠先向慈幃問蚤安往事已非腸斷絕
淚珠空浸枕痕丹

暎燈

銀燈照壁繪梅根
柂榦槎枒墨鐵痕
爾莫咨嗟予影瘦
清風搖曳向天翻

屋漏

椽標稀疎瓦不均
最宜仰臥數星辰
無端每值更深雨
四處霪霪徙坐頻

濕地

諸葛當年入不毛
七擒七縱耀弓刀
不才誤主緣秦晉
滿屋沙泥手自淘

負暄

兀坐窗間曝曉光
須臾乾盡草頭霜
園中佇看東風面
玉樹冰珠放早香

旱澇

垢膩纍堆豕負塗徘徊難語向天吁
羞從旱魃求漿水
搓箇泥丸彈小鮑

蓬首

亂雲凝結九秋霜
半尺銀絲百丈光
膏沐未施嫫母笑

心甘披髮豈佯狂

垢面

攬鏡驚看瘦骨微依稀曾識又疑非由他滿面灰塵厚
盡掬長江賴故衣

攀手

走老科場兒倒絅鯤鵬潦倒困鼯鼃辛勤珍重屠龍手
跨海長鯨劍底明

繫足

被謫仙蛾痛撫膺羸軀重載九層冰寂然默演周天數

枉費村牛綰赤繩

拘項

多生夙業巧還償香骨錚錚縹緲光天意若回離貫索
借纏梟獍助烝嘗

枯腸

早步青雲喪此生天人學貫亦虛名誰知靖節懸琴意
識趣何勞絃上音

淚眼

泣涕三年暗曙星亭亭日午尚疑冥幾時一吸鯨鮫血
銀海光搖兩炬熒

聞柝

梆鈴闌柝備皆空暴客翻持禦至公休笑貔貅顛倒用
從來盜憎主人翁

聽砧

春風蕩漾送秋砧四野淒其怨語深已恨羈魂難閉耳

爭禁婆婦碎敲心

鄰哭

天步艱難運氣屯狐狸號喊虎狼嗔既憐我舍哀生我
又痛鄰家哭死人

風鶴

連年笑我獨含悲何事狂且也皺眉佇望三山繁草木
鼙聲隱隱耀旌旗

砲警

大地崩頽海沸驚鐵龍飛舞血花生
頑冥猶逞貪痴興笑比元宵爆竹聲

感篥

愁雲黯黯墨光深日夜城頭哀角音
孤客旁皇難夢寐繁冤吹起鬢霜侵

鼙鼓

寂靜山河三載悲觸翻雄氣向天吹
漫誇晉鄙軍聲壯虎帳曾嘗屠狗椎

笳吹

沙漠秋清響塞笳文姬漫譜寫離家
纏荒炎日鳴螺貝蘇子題詩送落霞

吏稽

聞道狸奴點士名勸君高應莫心怦即今預擬朝金殿
只當傳臚第一聲

卒惲

狐兔嘻嘻燕雀歡牛襟馬裾沐猴冠盍看溷底水仙子

出沒如何咬磨盤

畫詰

陰森淒慘久無天鬼卒噭噭井底蜎佇望三山迎曉日
犁翻蛟穴啓桑田

夜查

黑風飄墜海中間羅刹更深檢大環漫謝諸君能効命
助予功遂玉門闕

值班

一羣纔去一羣過橫者猙獰達者和徐喚同儕觀後沼
霜風昨夜捲殘荷

交更

催更漏箭頗分明狂獅偏多怒吠爭睡早睡遲惟頃刻
自家窩裏亦無情

臭蟲

遠瞰冰肌亦可休偏恣吮嚙逞風流燃燈一指須臾盡
遺臭高名萬古留

蠍蟬

么膚腋膀度朝昏世務難譚且漫捫項直手攣難擺佈
留君幾日處殘禪

飛蠅

不住深宮警聖賢欣嘗廁穢逐腥羶白圭莫惹些微垢
塵拂高擎握老拳

遊鼠

牙鼠何堪也自雄跳梁竄瓦日當中那知衆怒終難犯

看爾臨時五技窮

聚蚊

餘血難供一飽餐徒勞歌舞未成歡貞姬寧露神筋骨
況我書生肉更酸

鬼啾

從來知有鬼神理今日忽聞鬼哭聲鬼若有靈攜我去
願偕衆鬼啾鼻睛

疫癟

肉盡皮穿心已灰
驚聞難倡悉生災
籲天早碎孤臣骨
留得羣英濟後來

碎衣

宮衣新著舞萊衣
矢報君親天下肥
詎料裏予成鬼瘦
機絲片片伴花飛

破被

敗絮朝朝雪滿氊
大如手掌軟如綿
凌霄片片天鵝羽
笑爾蝦蟆眼自穿

砂鍋

溫羹烹茗更燒湯急急煎煎沸沸忙無異臨場新子弟

旦生丑末一身妝

泥罐

玉屑霏霏手足龜圜中安得有烏銀生平自信如冬日
羞捧泥罐煖凍燐

瓦盆

鄰兒長歎斂雙眉陶器如何撞鐵鼎已破不須增顧悵

古人垂戒預操持

草褥

稜層榻板瘠腰臀那得溫柔稻草痕煩檢香根勤洗濯
藉予待罪大清門

敝履

當年踏遍越山川急拯民艱屐數穿閨困未蘇鳬折羽
子喬無計更朝天

破枕

漆園已覺枕難拋夜夜遊仙透露梢久擬追隨黃鶴後

梧桐月下賦敲交

箋筐

竹筐拳大漫吁嗟中貯松毛栢子芽蠻地借熏除瘴疫
還期蓬島採金花

竹刀

仙家夢授一冰桃縱不成仙亦足豪堪笑鐵圍叢狡黠
橫操竹片舞邠刀

草珠

心光早已摩尼圓不坐西方九品蓮緣係現身來說法
毘耶重覓草珠穿

油箋

三年懷握引清飈字紙參差纏飯高非是故人曾半面
獨憐向義勝綿袍

憶紙

昔曾簪筆染龍箋豈料身居弱水船欲寫新愁無寸紙

燕釵屋漏血痕鮮

憶墨

未盡灰餘亦可憎
曲蟠牆角鬼神憑
幾回夜半來風雨
誤認僧繇壁欲騰

憶筆

中山免子被狼吞
骨肉飄零絕五倫
幸遇烏龍能代職
牢騷犴狴補天根

憶硯

不親義獻已多年潦倒參苓典簿錢為惡奸雄銅雀瓦
眼前更欠綠泥碑

殘歷

將來萬有一時中四壁蕭蕭兩腋風留得天頌書一卷
每逢朔旦效呼嵩

炭痕

稀疎慘澹復縱橫塗紙污牆若墨點月下杜鵑搖素影
一團碧血一團聲

塵灰

改歲家家塵垢飛獄中也縛草枝揮禁之不可憑伊興
冷眼看他土面肥

煙昧

朦朧雙眼醒還迷晚爨鄰烟擾坐栖勉強扶筇出戶坐
斜陽遠隔碧峰西

乏水

江南冀北任遨遊吸盡名泉甘露浮閩海那知逢烈焰

惟求天雨潤枯喉

滅火

金爐灰冷亦虛供兩耳蛛絲密密封靜待青蛇復蜿蜒
重陰剝盡柄香濃

摘菜

菜根咬得是賢豪剔蠶搜泥自煮熬此處佳蔬滋味別
苦瓜間頓癩葡萄

執爨

巧婦曾愁無米炊
錚錚男子痛燃眉
捉襟露肘真前鑑
村女心知猶強為

食淡

口內由來氣味清
鹹規人嘆業全更始
知上古強兵術
煮海須教淡養生

縫綻

破袴頻招風雪侵
強為兒女倒金鍼
未曾乞得天孫巧
絲線纔穿指血淋

浣衣

衣絲汗煮污同塵
漬濯何曾為爾頻
垢膩雖高吾敝袴
且留片段蔽羸身

粉粥

展轉無眠病草併
饑腸雷吼鬼揶揄
不知粉粥如何味
半盞姜湯勝酪酥

餽飯

餽粥三旬啖半端
苦懷難遂豈圖生
偷兒莫浪稱周粟

據我貲囊餽我羹

柳茶

嘗遍人間萬種茶龍團拋棄不為嗟年來請盡泥漿味
翻憶清辛嫩柳芽

劣酒

對酒悲多萬緒牽老兵勸進穩愁眠入唇不用逃蘇晉
飽諳諸方五味禪

缺藥

生平孱弱藥為糧惟難何曾片滴嘗病不脫身命不絕
天留殘質砥愚狂

書庸

飛龍羽翼各西東顏色睽違夢寐通時有鱗鴻傳近况
拘攣疲指舞冬烘

醫匠

陳皮今已訛東尖桔梗枯枚態更纖醫匠醫王憑業口
猶如牛馬呼應兼偶有病者問藥塗壁示之故有此訛

敝席

敝席久已棄泥溝風雨凋殘剩半勾徐語傍人張後隅
半遮臭氣半遮羞

箍桶

團園陡被狡童隕棄置牆隅風雨摧惜器人來一舉手
出民水火躋春臺

糞草

草莖土滓漸成堆愁鎖眉峰解不開為諭廝童連夜運

門前高築斬蛟臺

穢廁

溷聯犴狴勢憑陵食藥纔擎穢氣騰遙計會稽青冢上
至今怒色響稜稜

溺器

藏足無頭縮頸龜夜闌晝永坐前遺從來獄卒輕人慣
燃則溺之奚足嗤

惡夢

世情雲變久心傷那更連宵怪夢長劍戟如霜鎗似雨

青燐赤血滿沙場

哭友

君雖先我喪無端猶有同心痛撫棺侍我斷頭歸碧落

只餘枯骨砥狂瀾

哭僕

愧我無才累汝亡兼貽同難斷愁腸英魂且莫離余側

生死相將歸故鄉

客俘

俘客何堪問客俘衣冠狼藉眼模糊可憐豚犬痴迷甚
鳳鳥摧殘飼野鳬

祭墩

廊廟新培巨棟梁却輕殿陛棄椒房多應不樂人間世
改貌希予絕覆藏

又

魚肉蒼黎困俊英婆娑蹲踞影彭亨祝君早供三軍爨

好了從前無限情

吞蠶

悞忪一毒舌根長不救斯須命即亡今既入腸湯沃雪
諸家本草謾商量

嘆鼠

兩鼠跳梁上一墮地死一克猫腹

穴中兩鼠謾相將拚命超騰競墮梁縱是武安屋瓦振

青霄明月自天闇

雪異

入夏甚寒驚傳郊外大雪越數日有人折來芙蓉兩枝光潔榮茂亦可駁也

歲前臘瑞已心驚
夏日何來碎玉英
蠹爾蜉蝣僵欲死
皎然孤鶴唳松清

葩妖

節候輕移幻夢空
祝融顛倒賣英雄
蓮凝白雪纏鋪粉
又放芙蓉弄淺紅

祝茶

頂禮潮音掉海槎
攜來一掬淨瓶芽
灑添半滴枝頭露
潑滅炎天萬頃霞

煮茗

旗槍浥露拂煙斜汲井頻將活火加遙望福堂心供養
趙州一盞綠雲花

諭僕

酸虀敗腐苦黃瓜茹淡遙聞爭自嗟一擲千金豈爾輩
何如攢聚買鹽花

酬醉

以下三首皆諭僕之詞

中道如何頓異初顛狂傲慢蔑龍魚勸君速盼平南詔

昧爽前頭縱赦除

詬諱

數代同炊義最親須知寒齒惜傷唇何如存養絲毫力
罵賊誅仇佐主人

格鬪

季春田鼠化為駕爾輩何心反變猪痴昧剛貪時悻悻
自塗污穢惹狂狙

告神

黨禍曾羈先孟博直將讜論讓臯陶予今謗祭因求死
好脫無辜烈俊髦

覓炭

同人共難苦離居一夜鶻啼百陣餘獨我聲銷血已盡
強搜炭屑寄魚書

老親

生兒雖喜實憂深萬事牽纏萬里心既痛負君復痛死

冀全忠孝費沈吟

又

伯兄舞象我方生十斛明珠掌上擎剛得宦婚情暫愜
那知垂白百無成

又

少攜三弟誦詩書綵袖雙承笑語餘兒鬢已添銀線縷
翻貽南望倚門閭

長兄

前年送弟渡桑乾話別酸辛判袂難此際滇中念母弟

仙霞哭罷望長安

蘇公

我前南邁病新痊相送悽然囑早旋世事已非休望我
三親獨賴汝身賢

允公

娶親聞汝詣金陵曾遣蒼頭荷擔簞自接維揚書信後
至今只有淚沾膺

彥公

痛汝何當我共炊祖遺全供宦中資既煩悅母兼勞姪
借券無償更費思

六弟

弱骨支離汝倍寃先違老父繼慈萱未偕伉儷緣多病
隻影茕茕急在原

病室

多病何曾解縕纏那堪泣血憶征夫支持且莫沾床褥
兒女啾啾累老姑

又

夢涉荒園坐舊閨
松風獵獵草萋萋
相看但訝顏非舊
蓬首無言掩面啼

兩兒

莫讀詩書莫戴貂
祖翁遺圃儘堪澆
懃勤侍母休頑劣
共孝霜婆樂暮朝

吾宗

數年未得聚昏晨
甫到都門又海濱
忽被腥蛟乘蜃氣

歸來無計泣秋旻

又

太傅家風文正開簪纓黼黻響春雷養親教子各從舊
莫向南荒作我哀

舊遊

臨安謁帝入長安夾路桃花一月看最是鳳城春色
麗五雲繚繞捧金鑾

感懷

磨炭和百苦恰哭屈原時細檢無可取焚之還自疑欲
寄何由寄收藏誰與持展轉勞夢寐一念百躊躇聊比
御溝葉隨流付所知代為消烈焰了此一番癡



范忠貞集卷五

欽定四庫全書

集部

范忠貞集卷六

七

詳校官檢討臣劉錫五

助教臣常循覆勘

總校官知縣臣繆琪

校對官助教臣胡子襄

謄錄監生臣孔繼峯

欽定四庫全書

范忠貞集卷六

清苑劉可書編

畫壁遺稿

有泊序

承謨蓬頭垢面紮頸攣手逢

萬壽聖節者三丙辰三月十八日肅誠向

關拜舞深愧忝生聖世不克振拔淪為誤

國庸臣辱親敗子乘未灰餘燼志梗概于壁俾後之

見者知余不肖不才所遭不幸也遡余生而庸弱
先太傅督訓嚴切冀有成立辛卯春

世祖章皇帝以元勲子選充侍衛復以年方幼穉免入
直扈從令在家讀書大慶賀入班行禮是年

詔八旗滿漢子弟有文學者與漢人一體鄉會試余得
登賢書明年壬辰成進士選庶吉士甲午解館授
侍讀學士余病懶性成常經月不至翰館而陞轉
之階反越常次嗚呼

先皇帝之恩何以報稱耶迨

先帝龍馭上賓余浮沈班末年餘循資陞學士時伯兄
克浙東援勦總兵官先太傅左右侍養無人余復
以多病恐曠廢職業力求解任辭至再始得請厯

三載

廷議撤援勦諸路兵馬伯兄歸京師丙午孟秋望日
闔族集東臯習射飲酒諸幼年子弟輩賦詩屬對
是日先太傅顧而樂之因謂余兄弟曰吾家世受

國恩爾等乘年力富強宜速補官為

國家効力中外勿以予老為念申諭再三不意予兄弟罪業深重先太傅于是年八月初二日棄不孝輩長逝服闋補秘書院學士先是先太傅在日今皇帝尚沖齡一日余與同官進

內請

寶

上詢曰爾誰氏子爾父何官今在否年幾何余悉具先

太傅始末以對

上喜曰爾若子耶如此者數四後值

朝賀期先太傅入賀

上指問左右而不名但曰此非某官乎且稱說

祖宗朝往事甚詳左右皆驚為異數余解任後代余者

同衆入

內

上問曰此為誰范承謨何久不見閣臣奏曰承謨病解

任矣此其代者

上曰果病耶劇耶病愈尚起用耶對曰病須調治一痊

即補

上領之者再先太傅聞

宸注如此感激益深因追憶昔年

太宗

世祖

舊恩輒向北流涕不止故亟圖報稱之語時加訓督

次年

上親御萬幾余與同輩日侍左右至冬巡撫浙江缺人
廷推及余

上色喜諭曰浙江東南要地國計民生悉委爾矣可善
為之余受

命惶悚自顧駑鈍膺茲繁要晝夜拮据寢食不遑而德
薄才微政多闕誤以致上干天和旱潦頻仍蟲疫
疊降二三年間僕僕山陬水澨勘荒拯災請蠲請

賑改折免徵心勞形憊幸

聖天子愛民如保凡為民請命之疏雖部議格不行

上必駁令再議或徑

批如所請行嗚呼不才如謨何幸有此遭遇也久之事益繁食日減舊疴新疾交攻孱體不得已以病

告

上憫念微勞准馳驛回京調理維時內而科道外而將軍總督提鎮巡鹽御史及兵民商賈具疏叩闈挽

留者日相繼始猶軫恤病臣未即報允後乃

允提臣請復留浙年餘余力疾視事不敢少懈會閩督

需人時余以他過鑄級例不准列

上特簡往任壬子十二月二十五日接邸報是日忽感

氣逆之症攻衝五內猝病陡險雖極力調治時減

時發遂力辭

新命未蒙

俞允因請

陞見欲面陳病狀

允之入都時即賜

召對首詢江浙生民疾苦暨經由諸處光景余悉條奏無隱次即俯問病勢何似獎勞備至親遣

御醫就舍診視賜秘府之方頒尚方之藥旬無虛日未幾以薦舉人才一案致詿吏議具疏認罪靜聽處方兼值舉行察典內外官三品以上例令自陳余因又以病告期得罷免藏拙丘園及

命下仍令速赴新任

御醫回奏又云療治稍痊可以理事余感激

主知不加斥逐任用彌篤尚安敢辭海疆之險偷衽席之安也

陞辭日

上曰閩海氛未靖地方困苦已極為天下第一煩劇要地卿廉能素著亦為天下最故特倚任仍賜

御衣帽

上廄良馬鞍轡迥異常數復

命近侍就

廷前宣諭曰

此朕時刻所御之服解以衣爾如見朕也次日入謝
賜宴畢面辭就道間關萬里堂上牽衣許

國以身不遑將母而戀戀君親之心從此與道路俱
長矣行至山東界宿羊留店相傳為折臂三公故

里其夜

賜驥忽殂余嘆息良久知馳驅天末終無功也及踰
浙抵仙霞闕一望層巒疊嶂瘴霧迷漫險灘怪石
奔流急瀨中藏猛虎毒蛇磨牙礪爪擇人而噬以
故村落荒涼城郭破碎崎嶇甚于蜀道變幻疑于
鬼窟履任後諏訪情勢檢閱冊籍不覺失聲大呼
曰閩疆之敗壞一至此耶大計軍政所以勸懲文
武此省豈無廉能循吏知勇干城而使之淪落一
官淹蹇萬狀廉吏勇將之心不堪問矣黜幽糾慝

么麼克數而貪酷悍婪日惟苞苴是營安享富貴
是執柄者與敗檢者之心不堪問矣學校考取人
才干請鬻賄而寒窗之彥百無一聞是奇才異能
之心不堪問矣沿海苦兵火者二十餘年有司加
耗重徵敲骨吸髓而蠲免之實惠不沾蠹役之魚
肉彌甚是父老子弟之心不堪問矣兵卒荷戈守
山戍海負嵎則有虎豹窺伺則有鯨鯢藉其死力
以爭此土而糧餉久至半年庫銀缺額百餘萬呼

庚呼癸之兵心更不堪問矣嗚呼海天半壁危如
一線雖智若良平勇如貴舍亦難展足措手而况
蕭牆之禍已釀於撤藩哉癸丑冬部臣入境奉
旨藩下左右兩鎮歸地方官管轄余與撫臣劉秉政提
臣王進功密議欲量撥一二營分防他處更勿迫
其行庶不至人心驚惶進功始應之而中撓焉必
圖盡遣以孤其勢余復密謂之曰此非孤其勢也
適迫渙散之軍心驅之附彼也失計非小須稍緩

二三月候浙江協餉至補給舊欠月餉再預發兩
三月銀米安家然後令彼前往則途次庶無騷擾
戍所庶無他虞急之恐倉卒生變進功雖意折仍
私自調撥屢催赴戍及擇期報明發餉起伍無何
果人心洶洶矣俄而滇逆蠢動風聞煽惑訛言沸
興及停止遷移之差員貴

命星至命精忠復綰兵符因得借口操練兵馬整頓器
械從前撥防之形迹催行之舉動豈不徒滋疑貳

乎身為邊疆大帥久歷戎行而不察時勢不揆人
心事未至則剛悻偏執事一至則倉皇失度亦可
哀也已至撫軍為全省大吏責任非輕會議之時
畧無可否竟若置身局外者不更可嗤耶余不幸
不得同心協力公忠為國之寮窠而罹于禍宜也
然予亦不因時艱勢蹙輒敢廢弛政事而不急急
收拾人心以為補苴計也故自蒞任來條奏諸疏
請速展界者安民也請撥現在協餉者安兵也請

將綠旗官兵裁去原額補足者實營伍也請免緝
投誠逃弁許投到宥罪安插本處者清山陬海澨
也題補城守副將用沿海勞弁者叙攻苦而邀不
次令之感激報効也報巡厯邊海一帶形勢啓行
日期者為欲置身外郡以便調禦防範也再如頒
刊示而准採捕者活溝瘠也就弭盜而聯保甲者
儲鄉勇也寬林簡修而招吳成者一安投誠一散
島衆也延林燧董生等因時相機者撫海逆也天

或假以時日獲奉

俞旨諸事就緒俟滇鋒一挫閩勢自孤而逆謀自戢天
乎天乎何竟使余為誤

國庸臣辱親敗子乎當逆居喪臥病時余每親至弔
慰乘間輒諷諭以大義冀感動其心余客嵇子留
山竊慮之常相告曰昔魏文貞有言曰寧為良臣
母為忠臣又語云神龍見首不見尾公其慎之舊
弁王天祐等亦跪進曰連日之會輕蹈不測左右

多戒心公獨談笑自若竊窺撫提二公中懷叵測不可與語余俱應之曰誠然余非昧于此也然以孤危之身處艱難之際當疑忌之秋唯示之以誠使小人無能乘其隙稍以緩彼之謀圖濟我事至于死生禍福誠不暇計既委身事主父母之身即君之身古云君憂臣辱君辱臣死且予非不知徒死無益但時勢如此百無一備同城共處舉動牽制上下左右皆彼腹心雖日日閉門築壘其能免

耶皆歎息而退督標兵馬向稱精銳聞自李公去
世漸次頽靡及余來點閱狼狽不堪名具實亡閩
安鎮為閩省門戶履任三月餘未遑巡視後見羣
情稍定欲量帶數十名兵弁往視形勢而該營將
佐方以帳房什物弓箭器械朽壞未整為辭逆即
隨遣官來言曰邇日民心稍安訛言稍息恐公遠
出又復動搖少頃撫軍亦來力阻且為相約曰某
在此久頗能得彼秘密有所聞即來告共圖報効

朝廷斷不敢悞乃公事余曰閩安之行不過一視海
口非久期長往既諸公止予不行亦可靖藩祖孫
父子叔姪弟兄世受

天家非常寵遇量無他志若公忠孝自矢肯以

朝廷之心為心

社稷蒼生之福也語竟心輒鬱鬱退而不能釋復一
客進曰公既不得看海何不因滇寇震楚以設備
鄰封為辭潛出省會扼據上流亦一策也予曰計

過矣楚于閩相去遼濶間隔西江風馬牛不相及
母論輕舉貽笑且啓釁端禍不可解不見閩安未
果之行乎所攜兵弁為數有限尚以諸件未備為
辭今往據上流誰與為徒錢糧軍伍城池人心一
無可恃今即不量多寡率爾前往或據延平或據
建寧誓死以圖一濟但彼逆念雖久逆形未著倘
或疑我據地欲陰圖之激變軍心訛傳京師風聞
者糾彈于前按罪者苛繩于後既冒輕出失守之

名兼招激變殞滅之禍身名俱喪恥莫甚焉余不為也三月十五日甲寅天初明逆遣員詣署跪請曰王守制數月未親軍務今海艘遊蕩乘滇南多故萌窺伺心訛言愈興衆情愈惑今新奉固守地方

勅命不敢以私心廢公事願與諸公會商為護內防外之策因喪服未釋不便就教敬遣下員促駕未幾撫軍來約同往詢以所商何事近有何消息但

支飾他語雖心竊疑之乃故坦然共轡以示無懼
是日愁雲漫漫冷霧漠漠太陽慘澹無光色入逆
邸中覺廊廡殺氣不可以目余知既陷虎口勢無
退理挺身而前仰天大罵賊衆兵刃環臨重加束
縛時一二狼卒有誤持劉臂者逆黨馬九玉急叱
曰不干巡撫事秉政但俛首無言兩頰微紅而已
逡巡間即揮之去伊惶恐斜趨而出嗚呼痛哉君
親倫理滅絕盡已余噴血切齒醜言痛詆欲激怒

以速吾死庶幾上酬

主德下報親恩乃大罵一日夜求死不得又欲不食死逆每羅列飲食予揮斥之舌敝唇裂齦肉俱腐罵至第八日氣雖漸微聲雖漸細聞者猶狼藉塞耳瞋目怒視然又恐余自死環守不懈余身層層繩絛肢體拘攣不能動作惟一息尚存罵聲不已不意延至第九日十日而精神頓復氣之微者漸壯聲之細者漸宏側耳其傍者以為恨而反以為

奇嗚呼痛哉豈余當死于刀鋸鼎鑊而不當死于
餓哉豈予罪深業重不能為

朝廷守疆土以致震驚

堂陛毒禍生靈當死于

國法哉當此時神魂恍惚常見

先皇帝儼然臨于其上先太傅儼然臨于其傍即遠而
太宗皇帝先高祖大司馬余幼所未經身事者亦親承
音容笑貌于夢寐之間慈誨慇勤嘉言慰諭豈余

思念所聚結而為形哉

天錫神聖默恤余之堅貞憔悴哉約計七百餘日之中著舊日衣帽時歷寒暑從未更換蠣虱蚊蠅恣其攢噬蓬垢疾病任其纏綿粥食半盂便可終日逆雖時遣問訊而惡語更加後亦不敢屢至防守者見余刻刻覓死百折不回感動于中多方憫解且為予言從前罹難時署中賓客親友及家人輩俱一時被執凌逼勘訊桎梏窘辱艱難慘切之狀幸

皆忠義自勵視死如歸不為稍挫而二三婦女婢
僕之類又能從容盡義夫婦子女相繼投繯嗚呼
痛哉聞之文武大僚平日建高牙擁大纛亦云極
一時之赫奕矣而望塵稽頽蒙面圖官保妻子而
活軀命者如雲屯霧匝獨余賓客戚友身未邀一
命之榮口未沾升斗之祿感予區區之意尚能念
君父重名節以身徇孤臣即健兒奔走之徒巾幘
臧獲之細皆知寸心不二臨難不移聞者得無稍

愧乎余以識闇計疏波累貽禍雖萬死其何恤焉
余居重垣迴壁中罵未已繼之以詩文左右不敢
具筆硯乃燒桴存煤畫字牆上其譏刺太毒者左
右旋即塗去前後僅存若干篇竝為文以序大畧
俾見者知不肖不才所遭不幸得死不易云螺山
髡翁炭筆識壁

詩

絕粒罵賊滴水不入口者十日不意惛寐之中一

縷血痕竟為左右竊斷痛絕

珍重衝冠髮幾根此心不共此頭髡一絲未了忠魂在
且向星前禮至尊

偶成

女蘿附喬木願言修世好豈意忽參商所趣不同道人
生掣電光誰能終其老金石物化常浮雲馬可寶

雨夜哀敝袍

畫裏為裘夜作衾更間半幅藉羸身並頭菡萏殘紅粉

隔浪鴛鴦泣血津夢學老萊歸倦蝶行同李路結寒鶴
高堂兩袖牽衣淚風雨搖燈點點真

雨霽即事

遙辭瀛海展洪圖何意一朝鱗甲孤戶暗織蜘蛛腸屈曲
墉穿牙鼠夢模糊片窗百孔風聲碎斗室千光燈影殊
最是雨餘床似洗月搖寒浪浴冰壺

秋夜

北風涼我牖蟋蟀達床鳴病影隨衣瘦繁愁向夜生思

親傷白髮報國愧虛名默對三更月勞勞萬古情

至日

憶昔日南亞歲時趨陪鶴鷺拜楓嶠到今雪窟孤臣淚
上苑誰傳雁帛知

除夜

一片丹衷歷雪霜歲華不信有滄桑東風此夜仍舒凍
佇待春回旭日長

元日

遙瞻北闕申華祝獨誦南薰憶舜琴弱骨倩人扶拜舞不禁揮淚五雲深

月下松濤

玉繩橫素月厯落列星疎清光照瘦影脈脈一燈孤我來實不造禍亂肇須臾軍飢民累重陬澨悉嗟吁嘔心廢寢食中夜起長吁移藩復坐鎮再給統兵符廟算思弭患叛孽逞逆謀嗟嗟兜鍪子誰為忠義夫倒呈生殺柄反而媚妖狐俊傑識時志妻孥富貴軀豈無桑土計

予口亦卒瘞奈墮稠棘中隻手難為圖惟將身謝國安
忍惜頭顱雖非齊壯士頗多慷慨徒健兒隨烈友視死
若歸途回首雲際松矯矯龍勢殊凌寒凝翠色霜雪剝
鱗膚形枯神氣勁悲風動海隅泰交陽候屆雷雨躍天
衢逆巢摧尺木孽種染鋟鉛鯨鯢生獻廟脅從莫勝誅
瘡痍勤矜赦淨洗血腥汚

聞署中同時被難諸人語言慷慨鬚髮蒼然感賦
從來聚首馳南北中道分張墮海隅三載天涯隔咫尺

百人心日照須臾凌霜氣節鬚眉見似鐵肝腸談笑殊
魑魅幾能潛白晝尚方連夜響鋟鋸

覽鏡中白髮

水月精神冰玉姿鏡中不肯愧鬚眉半生寤寐嚴三畏
廿載馳驅塵四知直破皮囊無一物空餘蓬鬢挂霜絲
首陽分淺常山慙默對清光影更癡

燈前梅影

味色聲香絕點痕飛來一段蟄龍根暗鬆雪蘊生春意

靜放清芬破凍魂遙望嶺頭雲共白回思閣裏玉同溫
冰姿鐵幹真孤調肯並桃蹊與杏村

紀夢

有小序

冬夜夢回月照孤影飄墮鬼趣比復聞大兄收
逆滇中老母膝下惟諸幼弟稚子殊不禁天
各一涯之痛

一夜召還京千軍列羽旌慰勞荷聖眷操縱欽文明
朝退歸私第良逢會弟兄樂奏霓裳舞觴飛金玉橫直

前不相認爭來問姓名道罷各悽愴悲定意猶驚幾日
違顏色大異昔時榮老親憐鬢髮禪子識音聲戚友如
堵立悲喜手交擎環詢亂離事欲語心怦怦腸斷聞殘
漏彷彿訴未成魂回忽萬里雞唱正三更霜威涼浸骨
痛覺恨餘生攬衣出戶望酸風裂目睛遙睇銀河月潢
池氣氣清捷音應絡繹宵旰蚤怡情寒渚棲蘆雁含貞
抱影鳴茹荼天色慘終憐副請纓一鼓摩雲翼攫茲鱸
與鯨佇歌旦復旦卿雲四表平

元日望闕

春回兩鬢復霜侵
愁病翩翾次第尋
食雪三年如一日
傾葵百面結同心
遙依北斗同陽雁
何日南薰侍舜琴
拜舞但能長叩首
模糊淚眼白雲深

立春

暮鐘哀角總難聽
曉起扶筇數落星
昨夜雪消霜便薄
燒痕放出一山青

絕影詞

何處春光秋更深碧山遙對是知音仰看明月低看影
空轉隨人惱我心

又

東君枉自費哦吟一任鄰家花落深祇恨影癡難共語
轉羞明月臥窗陰

控雁詞

三年日夜望樓船四壁牢騷裏暮烟寒雁若憐蘇屬國
血痕淡灑染晴天

瓶蘭

天生幽異姿雨露山中靜時發空谷香豈解悅人性寧作當門鋤那堪植汙境蚩蚩徒爾為形萎芳氣勁

抱犧吟贈嵇留山

陟彼惠山巔俯瞰融寒玉一掬流古今煩熱何能觸中
有抱犧人意靜明如練匡濟蘊珠璣微言飛雪霰我雖
世講誼心交方未久義在萬緣輕生死遙相守兒女曉
夜號椿萱驚日暮嗟此骨肉情天高難共訴茹荼傷雋

英繁霜華墨鬢仰盼雙鴻鵠輕陰逝甚迅

籠中畫眉

羣居幽谷中翶翔情自好素眉淡遠山清音越林杪虛聲乃足累羅網來相惱生遭輕薄兒欣持以為寶雕籠貯弱軀玉粒資宿飽錦繡障塵寒鼎彝供飲澡春風怨落花秋月哀衰草翹首望青冥振翼舒懷抱不愛金玉堂願共烟霞老

清明

春暮鶯聲那忍聞桐華柳眼任紛紜傷心獨憶先人壟
悵望天涯是白雲

夢僕

重重萬堵幾能違綱紀聲沈影亦稀若輩想應心念我
夢中常見喜依依

初度六憶

憶帝闢慈闢伯兄諸弟兩姪兩兒振孫
繩孫道儀道鳳並諸同難

國恩世澤萃孤忠生我之初便有終短袖不堪瞻碧闌
披襟尚可受清風武侯心事身猶在文正家聲樂已窮

黍谷吹葭知律轉萬年天子日長中

其二

愁魂斷續不成愁况復殘更催曉籌持印提戈空噴噴
宿鴉集鳳總休休廿年悵國千秋恨垂白貽親萬里
憂此際料應慈力倦呼兒名字血凝眸

其三

從來兄弟自怡怡因憶當年因約時蚤夜攜持如保母
春秋訓誨儼嚴師粵山松栢存孤幹滇水櫈槍照大旗

生死不同同許國幾番慟哭鵠鵠詩

其四

翩翩雁序聚朝昏玉立亭亭閥閱門三載在原頻入夢
一身無翼有誰援天涯抱恨吾膚髮膝下承歡爾弟昆
不必向南空祭奠望多好語慰慈萱

其五

君親念重實難支又復惺惺及幼癡儀鳳可能騰翩羽
振繩尚欲衍螽斯好尊伯叔如生父善養公婆即孝兒

莫恃嬌憨任意慣輕題閨事惱霜眉

其六

寂寞孤臣天際留夢魂猶自記春秋傷心雁字飛紅淚
壓壁霜華染白頭各為一人輕世難同貽百歲老親憂
俟來雷雨風雲合痛定依依話舊愁

寄祝嵇山農四十初度仍和前韻

心灰形槁學無為春鳥喧迎初度期口吐白虹騰噫氣
額消綠繭解愁眉看花浪捲魚龍憊笑絮泥沾燕雀悲

天地有情償舊約從容借箸事還宜

其二

來世情深寐不忘捨身割肉亦尋常浮雲富貴春冰薄
如雪心肝鐵柱強邁此毒氣迷嶺嶠存些正氣補穹蒼
留山筆佐螺山舌何用魚腸始快腸

其三

麟閣重開待若圖扁舟且艤漫歸湖靜看霖雨蘇焦涸
飽聽天風被朽枯博浪一椎情愈憤錦囊三矢志難孤

荒烟漸斂桑榆茂水月含輝朗暮途

其四

滄海塵凝桑滿田誰期仙侶復迷遭舍生斥孽渾前日
誓死食荼整二年浴日莫辭閩浪濶瞻雲已度越山邊
躍淵待洗煩憂盡連袂天衢謝夙緣

其五

佳夢頻頻遂苦情翹翔雲路一身輕綱常幸爾還天地
事業從新擁甲兵霹靂影中嵐氣靜笑談聲裏海雲平

攜筐共採天台藥不管人間記姓名

其六

抱膝曾歌梁甫吟春松徒費曉霜侵文章瀚海光風遠
節義從龍傑負深清白鼎鐘貽後嗣烟霞筇笠慰初心
峰頭共話無生訣笑領麻姑喚淺斟

口占即事

有序

仲夏朔朝武夷子插花一瓶用供大士品逾十
種氣備三時偶續舊句聊志物候不齊

榴花更比杜鵑紅蘭蕙翻翻香氣濃春去星攢十姊妹
秋光火噴玉芙蓉鳳仙低映水花色雞距高騰蒲劍風
更是素馨依竹籜蓮簪拗出濁泥中

憶業師

髫歲從師學鉅儒置懷口授互伊吾故容忽入連宵夢
猶囑綱常爾善扶

病中懷郭快菴

有序

連日吐血斗餘偶循牆散步忽見牆外絳桃甚

茂不禁目駁心驚因憶快菴太史晉中寄懷詩
內有只因白髮動離思及不使雙瞳到楚詞之
句每懸之壁間不忍數讀今余見此花輒作數
日惡始知潦倒愁人雖日在武陵洞口正不減
汨羅江上也

故人的的寄離思怕使雙瞳到楚詞壁隱龍蛇驚雁影
墨浮珠玉起秋思廿年譜未羞前哲萬里心悲誦舊詩
奈我至今情更異雙瞳又怕到桃枝

懷表兄李長白御史

幼同筆硯長同朝珥筆彤庭事舜堯補袞拾遺無廢缺
誰期遲暮遇狂獫

夢多總憲

通宵靜對繪民艱痛擬來朝慰聖顏却被鄰雞啼破
夢霜風冷月掛梁間

懷諸同學

究罷岐黃渴酒卮月搖弓影兩催詩呦呦鹿野驚虞獵

半走岡陵半網羈

食荔枝感懷

硃砂團裏水晶球
脆軟香甘第一流
前後剝吞幾半百
飛塵難寄淚空浮

故恩

少年愚鈍任天真
父執時承獎掖頻
今日顛危思舊德
力持一柱報鄉人

犴狴聲

八月十五夜捫炭桴書獄壁因以寄調

一線簷光蟾兔暉
一片秋聲砧杵韻
今宵處處理征衣
瓊樓玉宇寒難問
破紙疎櫺風直進
素娥無奈窺霜鬢
短髮蕭蕭悲正長
白不縞兮堅不磷

勾留吟

此鄰砧驚夢憶舊之作也詞內藏署中同時被
難諸人里族字諱

春月溶溶向夜深
松濤清韻漏沈沈
蘭亭少長頻來夢

踏泛勾留指碧岑碧岑高矗雲盤曲四野青濛星陸續
手拂瓊霄袖落霞目低銀漢迴衡玉玉衡遙指鳳凰城
望美人兮心怦怦瘦骨雖無縮地銜冰心尚信自天成
仰天欲語心轉苦懷抱縱橫天尺五奕葉貂蟬著國華
肯將姓字汚家譜倦眼迷離望莆田酸風如箭射眸穿
三年破榻悲誰語幾堵頽垣痛各天各天同難天應祐
紫電青霜烏巷胄將軍親執繡雕旗躍馬直前真盜寇
一戰成功抱犢閒朝來泛水暮留山那知多少東陵興

都付西風殘照間董賈文章虫唧唧窮通貴賤禪中蟲
誰御長風汗漫遊我欲從之萬事畢恍惚天際兮來我
真人駕玉麟兮飾寶琛建朱旛兮耀金廷邀王喬兮酒
數斟舞袁公兮撫珍琴韶武迭奏兮開余素心何以處
此寂寞兮聞太古之元音繼而坐予芝山之巔雙松之
下啓口微吟曰海日升兮東光明卿雲爛兮泰階平仙
霞開兮役五丁山魈馘海鯢烹何為悽愴憔悴兮日勞
勞而自戕其生君不見畫角鳴兮鼓聲起為我慇懃慰

諸子義仁忠勇萬人魁永壽芳名紀青史余乃爽然而驚肅然而迎三星在戶四顧一欷情耿耿砧聲清

武彝曲

有序

不見筆硯者幾三年矣病臥中偶成武彝一曲
贈武彝子也思欲寫出一觀武彝子伺守者團
食牕外乃閉戶垂幕徐出寸管滴汁于片石間
恍然如覩故人嗚呼痛哉拭目展紙之際臂酸
索重頭眩心搖因是數作數止半掩半舒揮淚

奮毫者移時方竟孤臣血淚義俠高風于此可以畧見且予自罹難以來眼前所有一切非舊獨獲署內御歷一冊朝夕捧對每逢君親吉旦以至朔望諱辰預自濯體齋心肅于五夜強起著我衣裳倩人扶掖荷械向北拜祝遙殫愚忱並效蘇子卿坐臥不離漢節之意倘予業緣已畢塗血有日遂我報稱列聖隆眷更望密檢其厯同此數點殘淚合而貯之俟逆氛掃

蕩持以示我兄弟子姪俾令見我心跡手書悉
我堅志苦衷感佩雲誼當與河山竝永紅螺寺
巨辯行者辱賦贈武彝山人時康熙十五年二
月初五日也

吁嗟戲淮陰未遇兮漂母哀螺山落魄兮武彝開漂母
一飯兮情生俄頃武彝三歲兮凝結成蚌自是有心知
順逆非因瀕死起寒灰三月十五雞啼晨轍門甲士往
來頻氣色非常人共駭城頭雷礮崩蒼雲蒼雲未散過

鼈鼓天吳欲沸刑天舞直憑談笑折狂鋒刀戟如林何
足觀刀比霜兮戰作林兩廊殺氣遏飛禽君恩臣節當
今日后土皇天鑒此心此心久許主人死誰解全軀保
妻子可憐相向大中丞俛首無言但爾爾一身九鎖聲
郎當鬼火空房淡日黃百計勸餐羅糞土踢翻几紫蝶
飛揚吁嗟戲我凜如霜兮人呼鐵面我衷如火兮人自
難見世受國恩兮父子兄弟敢忘報稱兮骨廟血濺
既墮鬼隔兮言返吾真咫尺首陽兮幸與為鄰常山舌

利兮鯨鯢膽碎吐氣如虹兮斷齒截齦左右難堪兮怒
色加環睛按劍語聲譁十日肉枯神愈健咆哮怒者亦
興嗟武彝武彝古人風慨吟包胥賦孤忠秦庭七日能
完楚君更餘三將無同君何不忍須臾死未必天心遽
如此懷光希烈真奇克終須斬馘獻天子君不見公孫
杵臼告程嬰成事稱難死事輕無論鴻毛與泰山漢節
終歸蘇子卿我聞此語轉增苦我何人斯比蘇武暫吸
滴水效吞瓊可能煉石將天補垢面蓬頭欹復欹滿前

異類總狂且生何為兮死有恨朔望踉蹌拜帝書多君
慷慨心如揭吾亦披肝飲君血炎荒毒日渴喉焚涼我
燕山片片雪冬月悲風透骨寒殷殷雅意纊還熱一曲
長歌筆未終啾啾四壁虫聲咽嗚呼誰為瀋陽之裔兮
予暨諸孫睹此片紙隻字兮須知為死血將盡之流痕
當思何以處此兮慰我生前未了之幽恨吁嗟戲滿目
冉冉兮八千里外之遊魂若使悠悠復泛泛辜負親恩

與國恩

予寫武彝曲既竟不覺慨然于中也久不親筆
硯乍逢故物悲從中來兼拘攣之餘隄防之際
遂致闕漏姓氏誠恐朝野之間兄弟子姪輩不
知妖氛逆焰中尚有懷忠抱義任俠者沈埋其
間而能物色孤臣周旋患難于兩載之久使持
此以報

朝廷則為鞠躬殫節之人具此膽畧以任疆場之
事則亦干城禦侮之選也予家兄弟子姪倘能

效古大臣以人事君之義則予雖橫尸巷陌亦含笑九原矣武彝子何姓許名鼎閩之泰寧人也行者殍何辱親敗子悞

國庸臣范承謨也

絕命詞

連宵烏鵲南噪曉聞

王師已逾仙霞耿劉二逆初謀攜裝泛海繼以策
情弗順始議投誠禁卒偵知其情密以慰予予

笑曰二遂即投誠終不免然必先殺我以滅口
因口占示之

一笑襟開萬怒平龍興有寺葬真卿執旗厲鬼爭前導
盡掃穿牆穴壁魁

范忠貞集卷六